

## Cussagl da cumün

Protocol nr. 14 da ls sezzüda dals 6 october 2009

### **Via da Prui**

La realisaziun dal proget preschantà l'on passà nun es realisabla, quai causa cha plüs partenaris nun han acceptà la clav da scumpart. Cun quella sanaziun as vessa pudü trafichar la via cun 28 tonnas. Il proget füss gnü finanzià eir da l'uffizi forestal e da la meglioraziun.

Il Cussagl es interessà dad avair üna via d'access chi garantischa ün andamaint da las gestiuns in quel cuntegn. Perquai es el da l'avis chi saja da far sforzs per cha la via possa almain gnir integrada i'l plan general da la meglioraziun e cha las lavuors da fabrica pudessan lura eir gnir subvenziunadas be da la meglioraziun.

### **Metz Fritz, chamonna da üert e mür da sustegn**

Il Cussagl conceda a sar Fritz Metz il permiss per plazzar üna chamonna da üert e per eriger ün mür da sustegn al nord da la parcella nr. 2723 in Fionas.

### **Bott-Rodigari Florentina, entrada parcella nr. 316 in Bügl Sura**

Duonna Florentina Bott ha l'intenziun da fabricar oura il tabla da la chasa paterna in Bügl Sura (parcella nr. 316). Per pudair realisar quist intent da fabrica dumonda ella da pudair passar la via cumünala da la vart vers süd da la parcella nr. 296 e da tour davent ün toc da lur üert. Il Cussagl es perinclet, fa però la proposta cha la via haja dad avair sün tuot la lunghezza üna larghezza da 4 meters.

### **Institut otalpin, süertà per investiziuns**

L'Institut otalpin ha inoltrà üna dumonda da contribuziuns d'investiziun per sanaziuns vi dals stabilimaints. Per survgnir quel import faja dabsögn cha'l cumün detta üna süertà da fr. 430'000.--. Il Cussagl sustegna l'idea dad investir i'l stabilimaint e propuona a la radunanza da conceder la süertà da fr. 430'000.-- per la dürada da 10 ons.

### **Center d'immundizchas Lavina, surdata da lavuors**

Il Cussagl surdà las lavuors da catram a la firma Palatini AG, Sent per l'import da fr. 47'680.30 e las lavuors pels fuonds da beton d'ür a la firma Walo Bertschinger AG, Samedan per l'import da fr. 7'542.65.

### **Immundizchas, fermativas**

A la radunanza cumünala dals 28 avrigl 2009 ha il Cussagl tut incunter la reclomaziun pervi da las fermativas per las immundizchas dals affars. Il Cussagl revgnischa sün sia decisiun dals 20 schner 2009 e decida nouv il seguaint:

- Hotels, restorants e butias survegnan la pussibilità da metter ün container stabel i'l center d'immundizchas illa Lavina. Il di chi vegnan ramassadas las immundizchas pon els eir metter lur container pro'l lö da ramassamaint in Plaz obain illa Lavina.

### **Baraigla**

Ils abitants da Baraigla han plont pro'l capo ch'els gnian suvent invlidats. Il Cussagl deplorescha quai e decida da far tuot il pussibel per megliorar quista situaziun na satisfacenta. La cancellaria trametta a partir da subit il mas-chalch als abitants da Baraigla per posta. Il lavuraint da cumün dess passar almain mincha duos eivnas üna jada giò la fracziun da Baraigla per dar ün'ögliada scha tuot es in uorden. In quist'occasiun vain svödà il container d'immundizchas da chasa dals abitants da Ba-

raigla. Il container d'ess gnir piazzà pro la staziun. Il Cussagl sperescha da pudair megliorar in quist sen la situaziun.

### **Conto “rechav our da la vendita da terrain”, segnar aczias**

Illa sezzüda dals 11 avuost 2009 vaiva decis il Cussagl da propuoner a la radunanza da nu cumprar plü ingünas aczias da las Pendericulas Motta Naluns. Il Cussagl resta pro sia decisiun cumbain cha la radunanza dals vaschins ha fingià decis da schi. Per retrar munaida dal conto manzunà han tuottas duos radunanzas (cumün politic e vaschins) da dar lur acconsentimaint. A la prosma radunanza cumünala vain preschantada la proposta dal Cussagl.

### **Plazza da giovar**

Il büro da planisaziun Wegmüller da Klostra ha elavurà ün stüdi per la plazza da giovar pro la chasa da scoula. Id es previs da megldrar ed optimar la plazza da giovar sur la scoula e da far ün passagi per rivar sülla plazza eir da la vart vers ost da la scoula. Implü esa previs da far üna pitschna plazza da sport sül tet da la sala polivalenta. Il fuond d'ess gnir cuvernà cun tschisp artificial ed üna banda cun raits intuorn. Il Cussagl es da princip perinclet cun l'idea ed organisescha amo in november üna sairada d'orientaziun insembel cun sar Wegmüller. A man da quella discussiun decida lura il Cussagl scha'l proget d'ess gnir preschantà a la radunanza da preventiv per l'approvaziun e per la deliberaziun dal credit, tant cha l'investiziun pudess gnir fatta fingià l'on chi vain.

il capo: sig. Reto Pedotti

l'actuar: sig. Andri Florineth

publichà als 13/10/2009